

白鹿書院志

白鹿書院志卷之十一

星子縣知縣毛德琦重訂

藝文

朱子升配十哲部文

康熙五十一年奉 巡撫卽憲牌內開康熙五十

一年五月十七日准 禮部咨開 禮科抄出該

本部題前事內開康熙五十一年二月初四日

滿漢大學士九卿等奉

上諭朕自中齡卽好讀書亦好寫字一切經史靡不徧

閎成誦在昔賢哲所著之書間或字句與中正之
理稍有未符或稍有疵瑕者後儒卽加指摘以爲
理宜更正惟宋之朱子註明經史闡發載籍之理
凡所撰釋之文字皆明確有據而得中正之理今
五百餘年其一句一字莫有論其可更正者觀此
則孔孟之後朱子可謂有益於斯文厥功偉矣朕
旣深知之而不言其誰言之於朱子宜如何表章
崇奉爾等與九卿會同具議以聞欽此欽遵臣等
公同集議等因惟我

皇上統紹勲華道宗鄒魯禮明樂備治定功成勤勞萬
幾間有餘暇手不釋書心惟志學躬聖神文武之
德契濂洛關閩之傳寶額親題昭文明於天壤雲
章永煥樹儀表於人間彰顯遺徽甄錄嗣裔旣光
前而耀後洵振古而超今而尤於朱子全集沉潛
研極實踐敦行嘗謂朱子發明聖道孰於至正高
不入於虛寂畢不雜於刑名使六經之旨大明聖
學之傳有繼孔孟以來爲功弘鉅今

特諭臣等集議優崇之典臣等謹查朱子在孔廟

庶先賢之列相應仰遵

諭旨移於大成殿十哲之入配享 先聖以昭我

皇上表章先賢之至意等因具題奉

旨依議欽此欽遵該臣等議得將朱子木主升配吉日

交與欽天監選擇去後今准欽天監選擇得本年

六月十五日丁卯未時將木主升配吉等語欽惟

我

皇上念朱子發明聖道軌於至正有益斯文爲功弘鉅
特諭九卿集議優崇之典移於大成殿十哲之次升配

理應告祭其祭祀供獻等項併派遣行禮官員交
與太常寺辦理祝文交與翰林院撰擬木主神龕
陳設等項交與工部照十哲例製造今朱子木主
既升配大成殿內其所遺原位不可空缺應將以
下木主挨次移升可也等因具題奉

旨依議欽此欽遵到部相應移咨江西巡撫轉行所屬
一體遵奉施行

知府周燦請建

御書閣詳六

鹿洞重興蒙 憲臺特疏題請

書扁額斯真千古曠典佇見 龍章鳳篆遙分北

之光玉笈瑤編長作西江之寶矣其扁額一項現在構買良材選擇巧匠俟

題額一到卽如式裝刻聽候懸掛外至

御書一項非尋常經書可比茲查鹿洞內尚有隙地一

區擬起建

御書閣一座高聳其制壯麗其觀上置

御書閣一架覆以黃龍錦帳前設供几香燭俟

御書

到聽候安置以昭臣子敬慎之忱除現在鳩工

庀材合行詳明以便刻期興工再有請者新工所需浩繁卑府一面那措支給仰祈 憲鑒准將二十三年拖欠銀兩追完抵補俟工竣一併造冊具報奉 批如議先將閣式繪圖呈覽其工料需費不足本部院捐俸一百兩餘准動二十三年洞租項下抵補可也

提學高

經久規模議

一洞規

見洞志

朱朱子教條明胡居仁規訓章潢爲學次第

一禁約

明李齡高資

各戒

並見洞志

一職事

主洞

其名始於宋明起為白鹿洞主見洞志合無禮

聘梅

內名儒崇正學黜異端道高德厚明體達用者

主之

無則不妨暫缺

副講

仍舊稱見洞志主批閱文字辨析疑義合無禮

聘本

省通五經篤行誼者為之

堂長

仍舊稱朱子有請洞學堂長牒見洞志主誘掖

調和

洞中學徒尊巡行督視課業勤惰主洞副講即

擇學

徒之優者為

之不

稱則更易

管幹

一人副管幹一人新擬增專管洞內一切收文

出納

米塩瑣碎修整部署諸務即於洞中擇有才而

誠實

者為之

不稱

則更易

典謁

二人專管接對賓客及四方來學者察其言貌

動靜

不係匪類然後通判副講副請以為可然後引

見主洞度混濫一清匪人不得托足學人皆有觀摩
且無供給不貲之患擇洞中言說嫻雅者充之按季
更易

經長五人卽談經義齋之意

學長七人卽設治事齋之意禮樂射御書數缺御增
曆律

引贊二人擇洞中學徒爲之以脩上司謁聖引禮

須聲音洪亮進退疾徐中節蓋四方於此乎觀禮必

主同副講平時教演禮儀學長考訂得失務與俗尚

不同火大一人樵採二人門斗一人司啟開洒掃

每夜提鈴巡守輪植

一洞中日用事宜建倉厥設庖厨積薪炭課樹藝設

香燈置簿籍立課程每月朔望開講初二十六會文

分別等第給賞

一儀註春秋上丁祭儀如舊儀

主洞副講初至管幹堂長率諸生迎於獨對亭望與

一躬主洞副講舉手卽下輿步至書院諸生從先謁

聖殿各祠贊拜如例諸生從而拜管幹堂長經長學長

爲一班最先次典謁引贊一班餘生徒以齒序出至
晏倫堂主洞南面東向副講南面西向諸生北面設
兩拜主洞副講答拜相見之禮也再設兩拜主洞副
講各以揖尊師問道之義也拜畢主洞副講如前向
設坐管幹命役人見一跪四叩首退茶役進茶副管
幹手進主洞副講平受不爲起茶畢諸生以次東西
班侍立醺訓誨再進茶如前畢諸生退就舍肄業主
洞副講起管幹堂長送就館少遲布席管幹請先生
歸席坐如前尊先聖不敢當正位也管幹親進酒
主洞副講干受不爲起再進肉食亦如之酒三行主
洞副講命管幹坐辭乃侍坐役人進酒訖轍席管幹
送就館役人進茶畢管幹詳視應用等器備否乃辭
退次日晨刻傳柳集諸生主洞副講率詣聖殿主
洞副講班級內管幹以下班次如例列庭中惟甚雨
濕乃許列庭下設四拜諸生亦從而拜贊引如例拜
起出詣文會堂引贊唱登講席席亦如前向諸生照
前班次北面莊齊引贊唱三肅揖揖畢以次東西立
侍進茶訖引贊唱鳴講鼓隨擊鼓三諸生毋敢出聲

主洞副講各拈講四書五經中一章以示學者并申
飭規約其講時堂長於講席後設几一凳一紙筆墨
各一敬書而藏之講畢役人進茶諸生仍照前班北
面謝教班齊引贊唱三肅揖揖畢先生起就館燕息
諸生退肄業乃張布新規約於文會堂朔望師生詣
洞副講率詣聖殿三肅揖出至文會堂先生南面
西向立諸生依班次北面一揖先生舉手畢乃會食
各就舍令節展拜如例不開講
上司當事到洞先驅至管幹擊鐘集諸生預設盥洗
所諸生分三班少壯者迎於名教樂地坊望輿一躬
上司當事爲舉手次中年者迎於枕流橋亦如之次
職事各生迎於獨對亭書院之中道亦如之次主洞
副講迎候於書院門外上司下輿乃一揖上司雖貴
必答揖一讓乃先行至洞副講職事諸生以次從引
贊引請盥洗所唱盥洗引至聖殿贊拜如例畢上
司當事親致修殿儀於聖座前再揖管幹收儀登
簿次日呈主洞副講查閱出詣文會堂主洞副講皆

抗禮止長揖上司當事坐南面東向主洞副講坐向
西若請開講則反是坐定役夫進茶除管幹辦理一
切不必與班餘依班次北面列庭中班齊引贊立應
下唱諸生見上司當事起立引贊再唱三肅揖諸生
向上三揖上司當事三舉手不平受揖畢堂長經學
長以次進立主洞副講後僞使令答問餘以次東西
立庭中敬總上司當事教誨役夫進茶畢仍以班次
北面班齊引贊唱諸生謝教上司當事起立又唱三
肅揖諸生三揖上司當事三舉手諸生送堂長仍侍
立進飯如例主洞副講陪席訖或留宿則送就館辭
退上司當事送至館門外次早主洞副講遣人覘盥
洗畢親至館門外上司當事揖入賓客生主洞副講
起居役夫進茶畢辭退仍送至館門外候上司當事
稍休息或部署訖乃請至公所進飯主洞副講陪席
堂長等侍立如例役夫進茶畢與隸僕從食訖起馬
諸生各於前迎處候送禮如初主洞副講送至門外
對揖上座乃入

尊官來觀鹿洞者宜預禁從官不得至洞送迎隨侍

以省煩擾且屋宇甚少處無所施也

賓客至諸生不班迎不庭見不侍立主洞副講迎送

接待禮如上司當事惟請開講則仍如講儀

常客至不焚拜謁廟致儀進酒饌如例止典謁一

人主之主洞副講不迎送惟通刺請謁乃得見

本省學徒至必先賁其人知主洞副講及職事生者

書札及其鄉貫姓名出身帖請典謁典謁引拜聖

殿修儀如例然後引見堂長副講主洞給號舍次日

辰刻率詣聖殿或拜或肅揖班於管幹堂長前猶

客也出詣文會堂於主洞副講設四拜答受如例主

洞副講皆有儀以存執贄之意厚薄各聽職事生東

班餘生徒兩班新生以齒序列東西對四揖乃會食

就舍

他省學徒至須先具姓名籍貫出身具呈於星子縣

批准方許入洞讀書所以防匪人也如名譽著聞爲

洞中生徒所熟識并賁有戚友書札灼然可信者不

在此限餘如例

主洞副講辭去當事先送歸先一日設講席如常儀

請畢另易勉諸生諸生謝教如常儀是夕設席禮如
初至次早先生率眾辭聖殿各祠畢出至文會堂
諸生咸面拜謝教答揖再設兩拜拜送答揖進酒饌
從從訖訖登輿諸生送至迎處除職事不得送餘願
送送者聽須於管幹堂長處告假
學徒辭去先一日向管幹堂長報至洞副講某人以
某事告歸查無經管未明及借出書籍乃引見一茶
罷退明早學徒辭聖殿各祠會食訖出至文會堂
於至洞副講前拜辭一拜四叩首先生扶之諸生以
序東西四揖如初至典謁送至名教樂地坊除職事
不得送餘願遠送者聽須於管幹堂長處請假
凡學徒有疑義先求開示於經學長不能決再叩堂
長不能決再叩副講不能決再叩至洞不許躐等
班次弟子列首管幹者慰賢勞也次堂長者有所統
攝調劑也次經長者重經學也次學長者崇實學也
彼善於此則爲之後來者不妨居上鼓勵之機也次
典謁次引贊重稱職也且可迭爲也餘以齒序長幼
之義也

一合用器具 鐘一口雲板一架柳一架鼓一架床若干桌若干椅若干凳若干厨櫃若干燭臺若干油燈若干木桶若干碗匙箸若干木面盆若干沐浴盆若干火爐若干衣架若干便溺器若干陶冶器若干以上各件俱以朴野為主酌定經數置完列冊交管幹點收

一祭器 查合用若干現存若干應補造若干查明陸續補置仍掌於管幹

一書籍 原有書籍若干其洞志書目今現存若干應補若干以上合無俟周知府到任查明報到日造具冊收除現在四柱清冊交洞中管幹收管其書有缺失當事及四方紳衿願送收藏者聽仍入冊註月日收於新收項下在洞生徒借讀者寫一票於管幹處領出以便稽考繳書銷票不許沉擱延捱致悞後來人借閱損失者勒限賠補又明巡撫邵公銳洞約內一條本洞儲書不許布政司科場借用以致遺失等語懇請勒石永禁

一每年支給常例 春秋二祭共銀一十兩令洞中師

生自行買脩祭品致祭俟洞租有餘再議擴充其府
縣教員各有學宮祭祀不必更與以滋煩費主洞
舊支送束脯百金聽自供膳今費用不給每季除供
膳外擬俸銀一十五兩每年共六十兩俟洞租有餘
再議擴充副講每年除供膳外擬合支送束脯銀
三十六兩堂長一人管幹一人每年擬支給銀
一十六兩副管幹一人每年八兩典謁二人
引贊二人經長五人學長七人擬每年每名支
給銀二兩經長權者無學長缺則無洞中諸
生賞格每月給二兩四錢火夫四名樵採種植
夫二名門子一名每年每名擬支給工食銀三兩
在洞師生人役多寡以百人為率約日費米一石計
銀五錢薪炭一錢腐菜鹽豉約五錢先生肉食茶酒
約二錢油燭紙筆雜費約一錢每日除一錢以脩會
文酒肉之用通計每日費銀一兩五錢便可粗給總
一年計之為費五百四十兩

一經費查現在之租似可常給五十人之食本道勉
指二百金撥該府擇買近洞腴田輸租入洞以充公

用此後或有捐輸置田入洞者日增月積自然漸多
一洞租徵收查冊內一條開報呈子縣冊報春秋二
祭猪羊祭器及陪祭各官生員供應并印刷各衙門
志書等款共支過銀一百二十兩零六錢八分等語
本道看得洞租原爲供給洞中學徒而設豈容別項
支銷前人置田增租以垂永久後人侵漁破冑以致
廢壞可痛可恨今後洞租止充在洞師生人役膳養
以及修整之費縱有贏餘存庫以脩支給不許官員
擅那別用借端侵尅春秋師生致祭洞志上司及遊
客取者官定每部紙價三錢洞中管幹掛號收發永
杜濫取苦累徵收租穀一項前據府詳責令府學
教官掌管本道細思教官止知較量錙銖罕有從大
體起見者且恐呼應不靈必致有名無實今後專責
知府徵收給發每年造具收支清冊并取洞中收頭
月日執給報查同學程缺俸并聽提學官轉報查核
庶邑宰擇於考成而堂堂郡牧豈甘染指於此三四
百金之內乎更請儆行各縣凡屬洞田永免差役則
佃戶踴躍無逃下拋荒之慮矣

洞生借讀藏書票式

某於某月日借洞內藏書某樣一部計幾本看閱

繳書銷票損失賠還

不致久淹時日此照

並不許借出洞外上司遊客亦不得用勢勒取管幹

亦不許徑發一本

知府張象文申覆朱子專祠文

爲謹陳鹿洞應行事宜事康熙四十八年四月內

奉 撫院郎 批布政司據南康府覆據府學教

授熊士伯陳稱鹿洞書院蒙

欽賜學達性天扁崇朱子也查前此祀李渤及周朱二

公爲三賢祠弘治間提學蘓公止模周朱二像於

中遷李於別室提學邵公又以嘗從朱子講學於
洞者十四人從祀改曰宗儒祠後爲宗儒堂並祀
程明道程伊川張橫渠陸象山王陽明於其中竊
謂宋時理學雖首周子但周子守南康時鹿洞未
興且與二程已祀孔廟鹿洞宜專立朱祠以其
門人配之蓋朱子集理學之大成其所著書與刪
定同功而興復鹿洞尤其生平所惓切者今

聖天子賜褒崇之扁未便統懸查彝倫堂左舊爲宗儒
祠近年新創高堂一所又次堂一所於中擇一作

祠懸扁不必另造儘可美觀定百世之廟祀快天下之士心誠盛舉也到司行府查議查得天下書院鹿洞獨盛蓋以朱子表彰聖教扶植人倫今天下同文四子諸書易象詩義家經戶誦未有不遵朱註者則朱子爲功後學實大幸留遺澤於江山講道論德之士聞風向往歷代當事捐俸置田延師會友凡以爲紫陽流風不可歇絕崇報之典理宜專立一祠造龕掛扁使磨藻格言照耀千秋庶於新創院堂二所擇一弘敞堅固者再加葺治定

爲朱子專祠選吉迎主入祠仍以其門人配之題
曰白鹿洞紫陽書院至於周程張陸並祀有年不
必再議等因奉 院批鹿洞原因朱子以傳朱子
專祀諸賢照舊令祀所議甚協如詳奉行
署府事同知蔣國祥申請另棚考試童生文

爲 上憲培植情深多士來學日盛懇恩詳請以
弘作養事奉 督學冀開康熙五十年奉 巡撫
卽 批據前事稱據南康府署府事詳稱白鹿書
院爲先賢講學之所自唐宋迄今肄業者不乏名

儒四大書院稱爲首焉歷蒙 各憲捐置田租資
給廩食四方景從不一而足復荷 撫憲栽培篤
厚敦請樂安貢生原敬主講壇席薰陶漸染文教
之隆較昔更勝顧諸士潛修靡間欣逢 憲臺憐
才念切衡鑒冰清卽如科試南康洞中拔取入泮
者同已允服士心第康郡紫陽過化人文美盛而
從學洞中者又多遠方寒儒雖此番考校極意搜
羅未免猶有遺珠敢抒管見自茲以往除府試正
案錄送外將鹿洞各府肄業童生另編一冊賚送

查核酌定於二十五名之中選取一名入學多則
按名計取約童生百名選取四名永爲定例仰祈
姑納據此該本道看得鹿洞名區旣爲四大書院
之首歷蒙 各憲置田養士恭遇今

上重道崇儒念鹿洞爲朱子講學之所

特恩頒賜經史所以文治彬彬菁莪蔚起不特本郡屬
俊彥鱗集兼有外府負笈之徒聞風而至浸浸日
盛人文較隆於往轍入泮宜廣於前規本道校試
康屬暗中摸索拔取洞童三名其有未經赴考者

仰體憐才至意另試一棚除外府計名外其拔四名然此入泮之數今日雖爲創始恐後難爲長規非批定額數垂爲永例不足以弘獎人文大示振興也合請 憲臺定奪着令嗣後學道歲科考試南康之時將洞童另考一棚定取四名撥入府學垂爲永例奉批鹿洞童生原係合郡與四方俊彥負笈相從聚散多寡不一未便以四名卽爲定額該道但憑文考取繳等因批發到道奉此本道仰 釋 中丞之意鼓舞更有深心欲使洞童努力讀

書競相砥礪但能人握隋珠家藏和璧風簫之下
競秀爭芳則珊網弘張定多入選故不限定四名
者正所以大示鼓舞也嗣後學使憑文考取如果
美不勝收或有時溢於四名之外而斷無不足於
四名之中在本道憐才之心藉以長留而該府之
詳請亦不虛矣爲此仰府曉示洞童咸知此意勒
石垂久奉此合行出示曉諭爲此示仰儒童知悉
奮力芸窓嗣後學憲憑文考取或有時溢於四
名之外斷無不足於四名之中庶鼓舞之恩與憐

才之意並匡峯而永峙矣

知府葉讓詳星子縣知縣毛德琦提調白鹿書院文
據生員徐枚蔡穉生李之輝郭旦年爲懇委賢侯
提調鹿院等事竊惟先儒講學必藉賢宰之張施
下士潛修端賴良牧之鼓舞矧茲白鹿書院本
朱子設教之區實我

朝育材之地恭逢 府憲德峻匡山操澄彭澤來學
者莫不師事惟賢聞風者亦且傾心慕義第鹿洞
之總持仰藉仁憲而書院之提調責在父師生等

伏讀康熙五十三年邸抄蒙

皇上念星邑係朱子講學之地臨軒慎選得有文章政
事兼優如大令者來宰是邦此重道而重官之實
心作人兼作吏之至意也矧自蒞任以來學本關
閩治繼龔黃士慶得師民忻有父紹往哲之芳踪
振先賢之舊蹟伏懇上體憲德下慰士心況前任
金父師曾奉上委提調舊例可循公籲轉詳批允
使得悉心區畫竭力栽培五十四年六月呈府府
看得白鹿書院乃講學名區各憲加意作人遠近

來學日衆一切洞務必須督理查洞志所載何有
督理洞務卑府曾經請復督務副講以府縣兩學
教官輪管已蒙批允但洞務日繁以教職專司副
講可以優爲以之兼任督務恐難區畫今據諸生
請詳呈于縣毛令提調鹿洞前來查毛令才具優
長邑稱賢令以之提調鹿洞自必區畫周詳另有
可觀相應詳請批示則鹿洞振興而文教光隆矣
藩司傳批仰候轉詳繳 巡撫佟批如詳行繳

白鹿書院志卷之十二

星子縣知縣毛德琦重訂

藝文

廬山記 節文

宋 陳舜俞

唐李渤字濬之與兄涉偕隱白鹿洞後爲江州刺史
廼卽洞創臺榭環以流水雜植花木爲一時之勝南
唐昇元中因洞建學館置田以給諸生學者大集乃
以國子監九經李善道爲洞主掌其教

書堂記 節文

郭祥正

祥符初直史館孫冕以疾辭於朝願得白鹿洞以歸
老詔從之冕未及歸而卒皇祐五年其子比部郎中
琛卽學之故址爲屋榜曰書堂俾子弟居而學焉四
方之士來者亦給其食

鹿洞書院記

呂祖謙

淳熙六年南康軍秋雨不時高仰之田告病郡守新
安朱侯熹行跡陂塘竝廬山而東得白鹿書院廢址
慨然顧其僚曰是蓋唐李渤之隱居而太宗皇帝嘗
送九經俾生徒肄業之地也書院剝于南唐其事至

鮮我太宗於迅掃區宇不暇給之際獎勵封殖如恐
不及規模遠矣中興十五年釋老之官圯於寇戎者
斧斤之聲相聞各復其初獨此地委於榛莽過者太
息庸非吾徒之耻哉郡雖貧薄顧不能築室數楹上
以宣布本朝崇建人文之大旨下以續先賢之風聲
於方來乎廼屬軍學教授楊君大法星子縣令王君
仲傑董其事又以書命祖謙記其成祖謙竊嘗聞之
諸公長者國初斯民新脫五季鋒鏑之厄學者尚寡
海內向平文風日起儒生往往依山林卽閒曠以講

授大率多至數十百人嵩陽棧麓睢陽及是洞爲尤
著天下所謂曰書院者也祖宗崇右儒術分之官書
命之祿秩賜之扁榜所以寵綏之者甚備當是時士
皆尚質實下新奇敦行義而不偷守訓詁而不鑿雖
亭間之淵源統紀或未深究然肯受和白受采既有
進德之地矣慶曆嘉祐之間豪傑並出講治益精至
於河南程氏橫渠張氏相與倡明正學然後三代
氏之教始終條理於是乎可考熙寧初明道先生
朝建白學制教養考察賓興之法綱條甚悉不幸王

氏之學方興其議遂革有志之士未嘗不歎息於斯
焉建炎再造典刑文獻寢還舊規開洛緒言稍出於
毀棄剪滅之餘晚進小生驟聞其語不知親師取友
以講求用力之實蹟等凌節忽近慕遠未能窺程張
之門庭而先有王氏高自聖賢之病如是洞之所傳
道義者或鮮矣然則書院之復豈苟云哉此邦之士
盍相與緝先儒淳固懇實之餘風復大學離經辨志
之始教山博而約自下而高以荅揚熙寧開勉樂育
之大德則於賢侯之勸學斯無負矣至於考方志紀

人物亦有土者所當謹若李濟之遺跡固不得而畧也侯於是役重民之勞賦功以狹率損其舊十七八力不足而意有餘矣興廢始末見於當塗郭祥正所記者皆不書

遊鹿洞記

王 禕

余到郡已數月欲至白鹿洞甚渴左右爲余言荆棘塞路不可往頃因伐大木往者衆路乃始通然路上虎縱橫苟欲往非多擁騶從不可用是欲行輒復止也會行省薦徽郡守取大木余挾星子令及都昌主

簿彭能領丁夫與同往去郡北行十五里至羅漢寺
路分兩岐由西入棲賢谷東則至白鹿洞也比至兩
山勢回合當其合處澗水出焉過澗踰小嶺有缺若
閉門然入閑路尋澗北並山轉澗南皆良田也約二
三里乃至書院遺址正當五老峰下書院燬已十五
年樹生瓦礫間大且數圍前有石橋曰濯纓其左又
有石橋曰枕流過枕流則從烈女廟登北岡岡上有
大杉木六七百年物有司今伐爲御殿木矣于是書
院所存者獨此二橋從卒指殿堂齋舍及風泉雲壑

棲址故處以告甚歷歷慨想昔日規制不可見惟聞
山鳥相呼山鳴谷應餘韻悠揚恍類絃歌聲或云從
此右折東南踰重岡二三里乃至所謂白鹿洞却從
洞後復右折陟嶺乃可到尋真觀望水簾也不果往
徘徊久之而還按白鹿洞唐李渤讀書處也南唐昇
元中始卽其地爲學給田以食其徒所謂廬山國學
也宋初天下未有書院惟有四書院睢陽石鼓嶽麓
及白鹿洞也太平興國二年嘗賜白鹿九經當時學
者數百人至崇寧末乃盡廢及淳熙七年考亭朱文

公爲郡始斥其舊而大之又定爲學規示學者來
者益衆而白鹿洞之盛出他書院有自後守其成規
二百年如一日也而廢今乃如此余亦無如之何
也余嘗怪世之爲佛老氏之學者其宮室亦廢壞輒
修葺之不旋踵豈佛老氏之學能盛於儒者哉蓋爲
其徒者有勤行之意堅持之操能必成故也至於世
儒習聖人之道常骹骹不自返不能以有爲而聖人
之道顧因委棄鬱塞而不得行嗚呼此其敝也非一
日之積矣余於是蓋重歎之也

白鹿書院志

卷十二

重建書院記

胡儼

白鹿洞在南康廬山之陽五老峰之下山川環合林
谷幽邃遠人事而絕塵氛足以怡情適興養性讀書
宜乎君子之所棲托士大夫之所講學焉唐貞元中
李渤與兄涉似隱于此嘗號白鹿以自娛故洞因以
爲名寶曆中渤爲江州刺史卽洞建臺榭環流水植
花木其盛無筭迨有闔于時南唐昇元中立學館設三
領賜經書給廩食聚生徒常數百人在當時謂之白
鹿國庠宋初天下止有四書院曰白鹿曰嶽麓曰

陽曰昨陽學者宗焉太平興國二年知江州周述奏
請九經詔俾國子監給印本驛送之皇祐中比部郎
中孫琛復置學館教其子弟四方來就學者亦給其
食後罹兵燹棟宇消落淳熙六年紫陽朱文公先生
來爲郡守親訪其處悵然興懷於荒涼廢壞之餘重
爲作興堂廡齋塾頓復舊觀給田聚書招延士類表
揭教條以爲洞規又上奏狀請賜勅額一時文風士
習之盛濟濟焉彬彬焉其用心之勤嘉惠學者之意
見於詩賦與東萊呂公之記詳矣後文公爲浙東提

舉復遺錢屬郡守錢聞詩建禮聖殿并塑宜聖像繪
十哲像其興教遺愛者不亦遠乎越二年郡守朱端
章相繼有作復撥田以增給焉興廢本未大畧如此
歷宋以及元季屢經喪亂書院遂廢殿堂齋舍鞠爲
茂草瓦礫荆榛翳於丘荒洪熙初余休致而歸偕侍
講余正安僉憲黃汝由嘗亦造焉周覽故蹟徒有感
而已正統元年東莞翟溥福來守是郡考圖閱志喟
然歎曰前賢講學之所乃廢弛若是豈非吾徒之責
哉於是率僚屬捐俸入以爲之倡而三邑義士葉剛

梁仲楊振德等聞風而興或出資貲或助力役剗穢
除荒取材就工先作禮聖殿大成門貫道橋次作明
倫堂兩齋儀門先賢祠以及燕息之所凡爲屋若干
間典事於三年秋七月訖工於是年冬十二月董其
事者剛美哉輪奐燦然一新郡邑士民莫不欣戴七
年孟夏監察御史昆明張仲益行部至南康躍然喜
曰能興文教郡守美事也乃擇日造其所遊覽之際
顧謂溥福曰是不可以不記溥福遂錄其事來告余
惟郡守者民之師帥教化者政之先務而獄訟徵輸

簿書期會不與焉今蒲福興廢舉墜能爲人之所不
爲可謂達治本知先務矣然必有教之之師養之之
具後俊髦而造就樂善莠而長育俾之知明誠之兩
進敬與義而偕立志伊尹之志學顏子之學庶不負
先賢立教之本旨也他日有賢者興道明德立嗣夫
先賢之教者則蒲福今日興建實爲張本云

重修書院記

彭時

江右名山以十數惟匡廬最勝廬山古蹟以十數
白鹿洞最勝洞卽唐李渤隱居之所南唐始立學

至宋表章爲書院而其規制大備於晦翁朱夫子此其所以最勝於廬山而有名於天下後世也予自始學已聞其名欲往而未暇成化丙戌冬蒙恩歸省道過南康首問所謂白鹿書院者郡邑學者言曰書院距府二十里其地正當廬山五老峰下前守翟侯嘗興役於久廢之餘今守何侯等成提學僉憲潮陽李公之志經營捐置重加修葺以去年秋始事而以今秋畢工視昔加宏壯矣予聞此益欲往觀焉又自以遠覲歲久恨不一日拜膝下奚暇從容他適哉乃不

果既至家居未踰月而名命遽下中貴護往還者促
行甚急予意曰鹿洞之行又不遂矣乃歲除前一日
舟次南康舟人遽報北風漸猛不可行中貴曰宜少
停以待風止予竊喜曰此乃天相予成白鹿洞之行
也中貴亦喜而偕行於是命驛吏具肩輿太守何侯
濬同知譙君頤教諭吳君慎等聞之皆騎以從循江
阜北行十餘里乃折而西行路徑崎嶇一水凡五六
渡而後至蓋其間山勢秀拔左右環拱如合抱狀如
有清溪上下多巨石間刻字多矣公遺跡背山臨

水榭宇翼然西爲禮聖殿又西爲先賢祠東爲明倫
堂又東爲文會堂俱有廊廡門塾制作合度不侈不
陋而又繚以垣墻樹以松竹深窈清曠誠於讀書養
性爲宜予入謁廟祠旣俯仰回顧心甚樂之但恨不
得久留以遂好古懷賢之思也悵然而去去數月何
侯喜來屬記吳君復具事實并致諸名公述作於余
以必其成顧予不敏何足以記雖然余旣不得久留
爲恨得托名于其間亦復何辭故不辭而記之曰書
院之作何所始其始於前代郡縣未立之時乎學校

未立而書院與理有不得不然者厥後郡縣皆有學
學校之政備矣實若無所事乎書院然好古君子乃
獨惓惓致力於此豈無意耶誠以學校課試遵時制
士未免乎科舉之習書院教養崇古法自可專於性
命道德之學也夫科舉之習盛則外重內輕趨浮華
而忘本實者有矣惟出于科舉之外而學夫性命道
德之學則士習正而真才出道明德立無所用而不
宜進可行道於當時退可著書立言垂範於來世科
日得失有不足言也吾意文公昔者與崇書院其志

固有乎此而今僉憲公與何侯等所以修葺之者豈
非欲學者學於此而有成然後借科目以進斯可建
功立業而昭實用於天下也耶其嘉惠來學之心至
矣遠矣學者尚體其心修朱子洞規之序必窮理以
致其知反躬以踐其實庶幾出處進退皆有益於名
教不尤增高於廬山大有光於江右歟請以此言勒
諸貞石以俟

重建書院記

節文

李賢

宋初天下郡縣未立學校時則有四書院而白鹿洞

其一也然此書院於今爲尤著實由大儒朱文公興起之也嘗觀文公來知南康建此書院於傾廢之餘用心甚勤所以爲賦爲詩求記以形容記述之者亦慮夫歲久傾廢尚冀後人有誦遺文而感發者或能續而修之庶復興起而一方之士有所造就矣此文公之心真所謂繼絕學而開太平之心也守斯土者果委靡不振則已苟有慕前賢之心則必慨然爲之而不辭也噫斯人也豈易得哉茲何侯所以重此是書院者蓋亦景慕文公之高風而興起也凡文公

之用心於斯者亦當體之而用心焉給田之未復者
復之聚書之未備者備之揭昔日之教條以爲洞規
集今日之士友以相講習必使是邦人倫明而風俗
美賢才濟濟見用於時庶臻實效而不爲虛文矣何
侯其視此而加勉焉苟或忽之則前功盡棄殆無異
於不修者是以君子所爲必慎其始而成其終也豈
草草哉

重修書院記

李齡

南康府北行十五里廬山五老峰之東舊有白鹿洞

書院後有崇山峻嶺騎馳雲矗而來結爲院基羣山環遠於左右前有三小峰峭拔奇偉如拱如揖西有泉水瀉出於岩谷之間衝濤觸石懸爲瀑布湧爲雪浪滙爲清池淵泓澄碧洞鑒萬彙折流而東經于院門而去嘉葩茂樹修篁奇石交布於其上唐李渤先生兄弟愛其山水之勝隱居讀書嘗養白鹿以自娛因以名其洞後經五季之亂故址已廢宋淳熙五年戊戌晦翁朱文公先生來知南康始訪其處復建書院又上言請賜勅額及賜御書石經監本九經于其

中列聖賢教人爲學次第以示學者置田以贍其用
每休沐輒一造與諸生質疑問難誨誘不倦暇則相
與優游泉石間撫幽發粹竟日乃返一時名人陸子
靜劉子徵林擇之輩皆嘗從先生游焉後文公爲浙
江提舉復造錢屬祁守錢開詩建禮聖殿塑先聖繪
十哲像脩官僚學徒行釋菜禮其垂教貽謀之意深
矣歷宋及元屢經兵燹書院遂廢我朝正統丙辰東
莞翟君溥福繼守是邦仍其舊址復構殿立像殿前
有大城門右有先賢祠中白鹿左涼溪右晦庵三先

生像像前有二程張橫渠陳了翁陶靖節劉西澗父子七先生神主在焉殿左有明倫堂東西齋儀門貫道門堂左有文會堂祠左有燕息房總若干間歷歲滋久梁棟朽腐成化紀年乙酉齡奉命督學至南康翼日謁書院仰瞻其陋謀欲修之適知府中州何君廉抵任且在國學素有師弟子之好因以命之君乃謀於推官沈英知縣周謹募義民廣延事等得聚五百斛鳩工聚材命三簿曹昇耆民廖篁高鑑教讀周維禎董其事邑人聞風慕義捐資財施磚瓦助力役

者比比經始于是歲八月朔日以明年二月訖工
重修其舊復增建兩廡櫺星門貫道橋剷除荒穢周
以墻垣樹以松竹殿堂祠宇煥然一新乃聚在泮諸
生朱暉梁貴等與郡人子弟之後秀者講學討論繼
先賢之遺教而興學于當時誠書院之再興也興廢
始末前祭酒胡先生記之詳矣星子縣學教諭吳慎
復慮是功不記無以示勸將來乃具其事請記于石
餘惟是洞山川之勝非若禪宮道院徒爲遊觀具而
聖賢遺像在是朱子教人成規在是先儒之遺風流

澤在是一郡之教化盛衰在是誠爲政之首務也孟子曰知者無不知也當務之爲急若翟何二守可謂知所務矣視彼陳官怠政徒知竊祿而有玷於名教者其賢不肖何如也後之繼治者尚鑒於斯

重建書院記

何喬新

廬山五老峰下有白鹿洞乃唐李渤讀書處洞中養一白鹿故名南唐元宗始卽其地爲國學給田以養其徒宋興因而不廢太宗嘗以九經賜洞中學者其津習之來學者嘗數百人至熙寧末其學始廢南渡

以來塲庵先生來守南康訪其遺址請于朝而復之
又定爲學規以示學者來學者益盛元季燬于兵燹
而書院墮廢殆盡學田多爲佛寺所據予少讀先生
白鹿洞賦及和尤延之廬山雜詠諸詩慨想當時規
制之盛渴欲一往訪風泉雲壑之勝尋昔賢之芳躅
庶有以自發者然宦遊中外竟莫能一至焉成化初
江西按察僉事潮陽李公世罔提學訪其遺址稍作
學舍又買田百餘畝又得廢寺田八十餘畝以養學
者創復之初猶未大備弘治八年嶺南蘇君葵由內

諭遷按察司僉事以董學政嘗過書院憫其隳廢思
更新之告于巡按王君元善又謀于按察使陸君珩
僉事沈君清沈君銳協圖起其廢宗室上高賢王聞
之助以白金百兩諸公又鉤較羨財節縮冗費以供
工匠之食材瓦之需乃屬劉守定昌撤其敝腐酌爲
規制中爲文廟旁爲兩廡明倫文會二堂以次居左
各有儀門以時啓閉文會堂之前爲延賓堂東西齋
舍六十餘間經始于弘治丁巳年八月旬日至明年
十月七日始用少牢告于先聖先師而落成焉時兵

邵郎中婁君性罷政家居諸公延請以典教事惟養
士之田未敷蘇君告于巡按監察御史陳君銓陳君
慨然以爲已任吏者學田舊爲僧寺所據者今多爲
汙萊廢壞矣于是收市閒先寺閒田四百六十餘畝
又市泗州寺蕪田四百三十餘畝合李君所置幾千
餘畝以供祀事以贍學徒先是鎮守江西太監董公
讓雅重斯文嘗謂先賢遺跡非圖經久之計不可至
是亦捐以白金十斤以益市田之值僉以爲百年之
廢興于一且誠爲盛舉乃具顛末令諸生黎允吳漸

求予爲之記予惟諸公此舉有功于吾道甚大必屬
諸大手筆豈鄙劣所敢當固辭不敢爲二生請之益
堅乃爲之言曰吾夫子之道至孟子而失其傳濂溪
晦庵二先生出然後有以紹墜緒而振絕學濂溪嘗
知南康寓家浯江之上晦庵亦知南康講學茲洞之
中則江右乃二先生過化之地凡一草一木皆衣被
道德之光矣况靈而爲人秀而爲士者乎我國家文
運聿興聖天子崇道以淑人心而在位任治諸公爲
意斯道因二先生過化之地作爲學舍以教諸生又

市腴田以養之延興教者以教之期得明睿之才以
佐休明之治而已凡來學于茲者仰廬阜之巍然而
興高山景行之思臨湓江之淵然悟逝者如斯之旨
尊所聞行所知斯不愧二先生之遺教而亦無負鎮
巡與在任諸公作興之意矣喬新老矣雖不獲與諸
生紘誦于茲然亦私淑二先生者也願與諸生共勉
焉既詳識其事而田之疆畝與稅籍之所隸具列于
碑陰弘治己未夏四月望

重修書院記

張元禎

南康郡白鹿書院入我朝翟守溥福起其廢李僉憲
齡新其頽今歲復多壞矣蘇僉憲葵以內翰遷提學
來巡按王侍御宗錫謀諸一二憲臣更爲大新之而
某人亦佐其費焉院制中爲文廟爲重門左爲明倫
堂爲文會堂堂前爲延賓之館規皆仍舊而棟宇堅
壯數倍兩隅列諸生書舍凡二十楹間則多新增者
明倫堂左故有二賢祠以祀李賓客周朱二夫子而
祔以陶劉諸賢位各以世列侍御深謂非宜特創祠
尊二夫子而陶李諸賢則別祠于其西焉愚請于諸

君宜因茲大新臨周程張朱四夫子於廟西配之次
如朱子昔所舉行諸君咸以非著典不果昔程守之
起廢未嘗延師聚徒李提學則禮聘賢士屬各學有
志諸生相與講學焉於時知爲已而學有就者固多
然喜名不情者有焉飾詐希覲者有焉學於此宜淨
滌名利之心力超名利之閑不如是則不惟晦吾道
其負正學而玷此地也甚矣胡爲乎來哉今蘇君亦
欲延師聚徒愚敢預爲戒之以無負今日大新之盛
舉也侍御雅意興學激揚之餘凡新學官於撫吉諸

郡邑十餘所致力正學甚篤憲臣陸憲使珩沈僉憲清分巡沈僉憲銳皆不忘吾道者是舉費約千金一出侍御與分巡之所規畫官民無預總其事而責成於經歷馮驥訓導雲龍江能則劉守定昌之功爲多蘇君志行必大振正學以副是舉愚紀其頌因以俟云

重修書院記

王畿

白鹿書院之名其來舊矣曠庵守南康思有以興化治民而化之所起必先於士乃大爲振作崇廟貌表

彰勝置典籍立科條增學田贖廩餼以待來學之人
而其風始盛於天下儒者之用所由以顯也自宋迄
今屢經廢復而興革注錯則存乎其人可目逆而知
也九江分守少叅伯益州馮公四明儒族以明進士
起家歷宦以至於此愍學餽法廉已愛民尤切切以
教化爲己任覩洞院之廢弛廟貌圯而典籍散學用
僣而廩餼薄來學者無所興起以先細民惕然動心
謀諸守土及主洞者以其餘力捐廩斥羨鳩工庀材
舉以次第廟堂墻垣煥然收餘經史子集稍以完繕

侵田遺賦漸爲清理礎石表刻象山講義以示爲學
之則勉士以倡化於民不惟其具惟其本可謂知緩
急之宜而不貶於難易之迹者矣嘉靖乙丑夏予趨
江右之會同舟南康入謁洞中與諸生聚講信宿歷
覽諸形勝稔知公之有功於茲洞也諸生輩相率徵
言於予予惟晦庵守南康時象山開講洞中因學者
事誦說亟進取而忘其爲學之本乃發明義利之辨
以決君子小人之所志一時聞之有泣下者至今傳
以爲盛公之所以作興如此其至諸生無能仰承猶

屑屑然不出於誦讀進取之間豈在上者之教使然
哉夫象山君子小人之辨嚴矣聞之至有泣下者羞
惡之本心所謂恥也恥之於人大矣知恥則由君子
可至於聖賢不知恥則由小人將入於禽獸人而淪
於禽獸猶不足哀乎予因諸生之請曾以續講留付
洞中大意則不失本心之良以究其志之所從來是
將盡以君子望於諸生而不忍以小人薄待之也諸
生亦曾有聞之而下泣者乎恥也者勇之近而入聖
之機也民知恥則爲良民士知恥則爲良士在上者

知恥則爲良臣良相不恥不若人何若人有今日之事吾人與有恥焉豈徒一時作興之迹而已哉諸生其以此轉聞於公從而表章之求其所以爲士者務成君子之名以無忝於興化導民之意由是以載公經世之美於無窮吾人與有光焉古今人同不同未可知也

興復書院記

潘志伊

自大江而西多名山匡廬實爲之冠其東南五老峰尤雄特唐李白詩云青天削出金芙蓉者是也李賀

客渤與兄涉隱居其下有白鹿馴焉故以爲名至朱
濂溪周子來知是軍始倡正學旣而考亭朱子繼之
於茲洞中增舍聚徒講學尤奏乞賜額給書則茲洞
不獨以名勝稱而尤爲聖學之標的矣凡前之官於
斯土而有志乎道者舉爲之置產益書以爲遊學者
資山塘田地至貳千柒百畝有奇藏書亦無慮數千
卷近因故相建議以天下郡縣旣有聖廟學官而廣
在復有書院徒以開俸途飾虛名背令毀革以是洞
有先聖賢遺像僅留田三百畝供祭祀餘悉令分市

諸民收其直以爲國需是何一時所遭之厄也朱子云今佛老之宮一郡一邑凡有幾而夫子之宮何嫌於二陽明子云書院之建譬如於軍伍中擇其精銳者別爲一營耳余又以爲今寰宇名勝之墟率爲二氏所據而惟此一洞屬之吾儒更復弗存不幾於陰獎異說毀吾道而去之幟乎況天之生才也難而成之也尤難多方以振之猶不克就乃又拘而局焉位不翱翔容與以適乎六中不尤過乎幸天子明聖尋悟其非用言官奏遂於復之時殿宇亭榭與昔同

諸祠及棲士肄習之所多頽圯不支或窓闔不庀而
洞田之分屬於諸縣者惟星子都昌二縣價尚逋半
可復建昌縣田價民旣悉輸而用之公矣余因議以
二縣田咸歸之洞以其價還之民尚得田七百六十
畝有奇入其稅以充諸費稍增其中傭役專選一郡
博主之又計前用羨餘租與尚逋於民者并得七十
九兩有奇以鳩工庀材凡棟楹梁桷之腐黑撓折者
蓋瓦級輓之破缺者亦白之漫漶不鮮者或易或葺
或整或除或墜或獲以至圖書器皿之類皆檢理而

重籍之使於前無修於後無廢於諸監司之隆委少
稱而余夙願亦幸獲酬焉實經始於萬曆癸未十二
月三日至甲申六月七日乃畢郡邑之博士與其弟
子員濟濟融融瞻拜聖廟咸喜勝典之既湮而復光
也講余爲文以紀之余旣不得辭畧叙之若此

復修廟宇記

張位

朱先生海內名師也拳拳以興教造士爲念行都來
斯先撒謨語勉勵諸生復爲講章闡明性命修道格
物之旨多所獨得誦之者具有省悟旣命博士卿

領洞教士又從豫章范府君薦延請布衣章君來主
講席取諸郡俊髦士有志者會聚其中聲應氣求欣
然嚮往名山勝地林巒草樹蔚然一時生色焉至是
將謀鐫朱先生訓語於石以永勵後學蓋盛舉也田
侯致詞屬余言以紀其事噫余諸生時曾從天臺王
敬所先生來遊洞中山翠透窓流雲遶戶咏歌絃誦
心夢皆清汨沒塵網三十餘年思一再詣無由今浮
屠梵剎金碧日新白雲縹緲間常有冥心絕欲之士
超乎聲利故塵世慕焉慕之斯崇之矣乃其教所由

盛而不廢吾徒愧之欲以塵土之蹤詣清虛之界是以往往自甘淪墮而弗克振也今茲地也朱先生倡之四侯主之博士卿君布衣章君領袖提醒其間精神感動朋來聚樂山增高而水增深矣慨自政廢而後師道立學校頽而後書院興居斯遊斯倘不爲性命真切之求經綸實務之講師者徇名而赴士者爲精而來又何以異於競進奔榮者之爲耶洞不負士士負洞矣故教以人而興地以人而勝會以人而盛言以人而傳然則今日之舉余所嘉歎而樂與之者

亦惟其人焉故記

重修白鹿書院記

葛寅亮

廬山之陽爲星渚其陰爲江州相去不三舍余於江
州改創匡山陽明書院每坐書院支頤對五老峰則
憶白鹿洞在其下紫陽故蹟昕夕睇盼間爲栩栩神
往者久之以公事入省會輒紆道踰吳章直趨五老
峰前小憇白鹿洞見其巖壑幽邃林木翳然真名教
一樂地也振衣升講堂謁先師規制與黌宮無異蓋
使人肅容起敬問當年白鹿何似一生指龕中石鹿

以對余不覺失笑已導余捫蘿歷澗西流一石壁紫
陽手書鹿眠處三字庶幾近之然恐亦是鏡中像以
白鹿尋白鹿猶之以紫陽覓紫陽已又導余遍讀屏
間所鏤喻義章心性圖古本大學彷彿登羣玉峰頭
片片璚琳無非至寶四壁長歌短詠亦自琅玕滿眼
不必辨其是唐是宋也獨其殿楹學舍皆頽然就圯
周遭危垣敗桶且岌岌不支矣諸文學以爲請余
諾隨約郡守賈君掌洞事劉丞商度資值該幾何
役書甚具則盡發餼金之在南康者以給費君益

資佐之期爲山南了此公案亦一快事也冬十一月
余適至自饒而復止洞中一日夜因與劉丞偕星子
王令次第達觀中左爲講堂中右爲禮聖殿又左爲
宗儒堂右爲文會堂今更題講堂爲講修堂左右廊
廡號舍盡拓而新之大門西出文會橋與坊塞上流
徑撤去改門從講修堂出走下流古枕流橋一生前
曰此舊制也余又不覺失笑古人乃先獲我心乎各
堂前遍先賢祠號舍又石屏橫障林木蒼蔚未易看
西山來爽氣乃爲伐其條枚遷先賢祠于左外之東

隅又遷忠節祠于右外之西隅與相配兩石屏益拓而前回巖窵谷病其蓄極不妨以空明張巒竒也門外溪流建瓴直瀉爲跨峽口築二石級四時涓涓深碧可鑑不令見石骨峻嶒石坊移豎廻流山則大鐫名教樂地爲洞門深鎖處講修堂後爲雲章閣會書其中又陟而上曰喻義亭前跨澗而峙曰龍虎亭澗東曰獨對亭曰聞泉亭澗西曰釣臺亭曰朋來亭各稍有更置加以點綴微見本色又別置亭鹿眠處毀前石鹿標此鹿眠猶不失爲元公愛蓮池也經始

于萬曆癸丑仲冬月工將告竣而余適有遂初之念
以請告行矣復過洞中南九兩郡諸生偕集板余留
一日爲揚摧疑義郡守費君及丞倅以下咸在焉余
乃拈屏間子靜義利之旨當時聽者至爲泣下今不
難再申一過未諗更爲泣下否若猶未也則吾儕尚
不及虎丘一片石何況紫陽會下諸賢哉朱陸之先
有濂溪後有陽明皆以曾設教茲地而祀之宗儒者
今其人安在吾天子學琴師襄而見文王之貌黯然
黑頽然而長視如望羊吾儕能有神交千古之意乎

則四先生左提右挈當自應接不暇矣白鹿之從遊
得傳者十四人而星渚居其八可謂今日之聞知果
遂有遙見知哉是役也南康知府費兆元同知劉汝
芳通判黎衷推官朱之屏星子知縣王成位皆踴躍
從事故能功成不日也又星子主簿張偉董其役例
得附書

重修禮聖殿記

熊德陽

自宋設南康軍至于今垂五百年矣先後守茲土者
不知其幾而方策所載士庶所傳則十有六人最著

宋得其七元得其一明得其六清得其二焉此數公
者善政曷可殫述大要有功于鹿洞居多予嘗考之
宋熙寧間周子知南康軍其時鹿洞尚湮而星渚之
學實自濂溪開之淳熙間朱子繼守乃求國學故址
于榛莽中重建書院置田聚書以教養學者而鹿洞
始著朱子法錢公聞詩來建禮聖殿塑聖賢像以復
國學之舊歛後陳宓朱埜章黃桂劉傳漢次第修舉
增置學田至二千畝而教養之制益弘元大德間崔
翼之又多擴充見虞道園記元末被兵焚學宮茂草

而學田之畛域亡矣明正統間翟公溥福來守剪荆棘創聖殿賢祠以復其制功不在紫陽下景泰間陳敏政復塑聖賢像成化間何濬始稽新舊田得二千餘畝召徒講學聘名儒主之萬曆間潘志伊田瑄袁懋貞皆踵其事力爲修舉學宮煥然定田制三千三百餘畝可謂盛矣後此遂爾寥寥

國朝李長春徐士儀相繼爲守展謁書院慨然有興復之志而詎于時勢不果行惟禮聖殿傾欹敗漏聖賢像俱在風雨中二公憂之乃各捐俸命工修葺數月

仍還舊觀諸生感其義不忍泯其功乞予爲之記予
惟書院與世道相爲盛衰者也世盛則從而盛世衰
則從而衰往往皆然然操盛衰之權者存乎其人道
非其人不行學非其人不講山水非其人不靈制度
非其人不立自宋迄今垂五百年守茲土者不知其
幾而當世所傳聞僅十六人豈十六人外遂無賢守
哉蓋道學者出治之本圖教化者爲政之先務而錢
穀訟獄簿書期會不與焉此數公者獨能崇法先賢
啓迪後進可謂知本圖急先務矣雖然興學者郡守

事也所以勸興學者非郡守事也上之人俱有責焉
吾聞何田二守時賴李朱二使君爲之倡率故得從
容肆力聘布衣胡居仁章潢輩以主洞事而教化大
行今徐公亦奉中丞蔡公之命求主洞者舉前翰林
方以智布衣方文以應中丞佇望方殷徐公適丁艱
去轉屬司理胡君星子薛君視其成蓋中丞身任道
統銳意興學方惓惓未已也况前守李公今又掌憲
所以佐蔡公興學意殊篤則先此未竟之業尙有待
乎予因記禮聖殿而并及之李公長春字升圃遼東

人徐公士儀字伯羽建德人

重修白鹿書院記

蔡士英

道在古今若日月之經天江河之緯地也卽或盈虧有數而光照之體終不晦消長有時而流行之機未嘗息是故將喪未喪無惑乎在茲識大識小薪傳于學者尼山立極以來後儒莫不奉其一端以互鳴于世至宋而說爲大著宋之言道者不一紫陽先生其最著也紫陽之學無地不闢白鹿洞書院其首稱也鹿洞自唐李賓客隱其地而名始彰自南唐設主領

而國學始傳自宋表章爲書院而生徒講習之規模始大備迄今白鹿洞與匡山彭蠡屹峙爲三不朽矣後雖興廢不常修復亦迭見大約終宋之世盛衰凡四歷至元大德間凡再歷明正統弘治正德間代有哲人江陵僞學之禁熾而書院幾毀于數爲陽九鄒吉水請而復之章舒輩出蒸蒸盛矣永季兵火頻仍禮崩樂壞周道茂草宮牆傾頽余入境詢知之卽罷勉圖復檄南康郡縣清洞田修堂廡議增起文移不一而足又商于臬司李君長春親歷其地乃聘賢紳

熊諱維典者主持壇坫講明絕學庶幾復見紫陽之
盛亡何李君陞任行郡司理監糧之淮星子令忽又
淹逝以至料理中乏生徒散處迨余膺督漕之命候
代星渚欲觀鹿洞威儀修理聖宮流覽舊蹟見徑荒
不掃塵莽滿院詰其故乃知歷課沿侵干胥隸幾無
欲清之人主洞者不得安于絳席宜耳噫嘻以余數
年加意觀成無期毋亦任斯土者之過與雖然余何
敢少懈更爲之經紀其中立條規追逋負侵沒者誠
不貲然未可盡究矣量追銀兩重新聖殿復該洞內

原租每年輸銀若干奈浮冒無數是使諸君子養士之資徒果匪類之腹甚無謂也今酌上中下三則而倍增之得額銀七百二十金又爲納價新輸吳蘇子田產六百一十九畝有奇每石折價三錢共銀二百一十餘兩合舊額爲九百三十八兩其間春秋祠祭並主洞者之公費出洞長與諸生之常儀會課之賞格以及四方賢士大夫訪道問業於斯者各有優給又設督洞儒官一員當擇土人之才品兼擅者余嘗定充之端領月支俸薪之事而每季收給租銀歲終

會計則惟司理是責令具清冊四函一存于洞一存于郡縣一申于撫部院一報于余以備不時會同查核凡積蠹之寢食于此中者其弊盡釐矣約計歲費七百八十六兩而諸務無不畢裕其餘銀存貯府庫使備修造之用勤于石永著爲令規條亦既畫一也是時李君以楚左轄內召夫斯洞之興李君大有力焉余聞其將至潯江輒喜以同心共事之人風帆不遠惡可不速其來共襄厥美也乃飛舸沂迎李君果喜而就余是日余值交代事不遑李君欣然獨往一

時主洞及諸生聞李君至並鼓舞稱慶李君歸言于
予曰洞中規畫燦然明備彬彬秩秩方隆未艾庶幾
千餘年明道之區不墜于今日矣余莞爾曰明道之
責主洞者之教也余何敢忝惟是木頭竹屑之務廩
肉餽粟之瑣業已心籌口授纖悉無遺幸不告罪于
先賢懼滋釋耳若夫薪盡火傳俾經天者不晦緯地
者常流更在後之君子留意

重興白鹿書院記

李長春

歲乙酉西江載寧 朝廷子惠元元之詔簡良二千

石師帥遐藩丙戌銓部以南康守請余不佞承乏拜
焉有客過余慶曰是郡山喬水濱固宋大儒茂叔紫
陽二先生舊理也城雖斗大而濂洛關閩之學戶誦
家經公寵被雄符職無不統覃敷文教惠彼南方猗
歟時哉迄秋抵任喟鴻遍野狡獪訐潢視事之署僅
支以木惟治圃之左古亭歸然卽元公愛蓮池也無
何適八月丁次之吉有司奏故牘當詣白鹿書院謁
奠先師乃率僚屬觀明蒞禮顧瞻殿廡圯頽已甚
隨升堂集師生宣布古人廣厲學宮之意已而勅曰

此李賓客游息之塾而朱夫子興育孝秀之地也海
內稱書院者四嶽麓石鼓睢陽皆不能如白鹿之盛
豈非以其泉韻峰姿實甲匡彭凡出處于中者指爲
杏席洙壇耶今戎馬之餘薨椽勿飭神輿不莊次省
多士藏習之所亦又苦侵董帳鶴宿盧儲其若子矜
之刺何方召匠氏謀葺而問之後會鄒東燐起蔓及
芝信余踵渤海後卑騎緩之戈遂用止丁亥間以其
暇撤署之木支者易之復紫陽門迎二古襲濫之氣
南秋則離使者之命下矣蓋余之官南康匝朞月

耳既屢與于警院之祭而天祿之校研露塵松幾進
童冠而尋孔顏樂處也將赴臨安謁剖圭俸約數十
金以貽前知府事聶君應升爲藻葺書院之費值戊
子之亂役不克登庚寅聶君乃以商之今守徐君士
儀司馬黎君民貫司理胡君淑寅星子令薛君胤隆
咸唯唯允余指于是協慮陳謨遴材鳩工先新殿廡
次造文會講修之堂計閱數月而竣雖規模如前而
筠几霞幔雅滌山靈矣諸君推余倡始之緒預伐五
老之石書厥所自時余已除閩福寧道使者輒鯉函

箋圖具註顛末不遠千里乞余言以紀其繇余不能
辭然則請詳其說以廸多士在昔姬周應命少師衍
疇皇元肇基魯齊秉軸二君子者植彛倫君臣之表
夫固多士之所景行者也今

上崇儒右文投戈講藝 駕幸辟雍矜式唐虞三代之
典庶幾羽林虎賁其俾通經多士誕生文獻之邦得
讀茂叔紫陽之書遭逢昌辰覽此弄月吟風竚俟聖
紳正笏若惟是終南捷徑顛岐彛倫君臣之鵠則叨
叨白鹿猶將強之卽起文翁其何能穀雖然漢制郡

國歲舉明經孝廉夫成人有德小子有造觀摩教學之力也余不佞緣倡始之故附名貞珉深切相與有成之義矣是爲記
皆順治七年庚寅八月中秋日

重興白鹿書院記

熊維典

四書院之名著于天下而白鹿洞爲最基千唐開闢于宋紹隆于明考亭象山之緒與風泉雲壑之勝交輝並映由來舊矣頃自四郊多棘俎豆缺聞講堂草深將爲馬廐游人慨歎者累息也
大中丞蔡公來撫江右創見彫殘首先約法運道崇文百廢偕興公方

運籌戎馬攬轡榛荒請命扶傷日不暇給也然已訪
存勝蹟糾萃典墳至于小儒蟲魚之技猶不憚折節
旁蒐珍于珙璧諸書院在境內如鵝湖白鷺濂溪等
處並檄委重興意惓惓也而于白鹿尤篤矣維時臬
司李公執德清邵與公同趣而嘗爲南康守雅意興
復于是禁侵濶論灑掃清舊川增新畝謀修築煥饌
量延師儒立章條規講課公一與李公手咨筆畫而
施行之經營周密移札填委悉心銳意若此者使但
以記誦詞章之學爲諸生資進取則何待乎白鹿之

興而公爲此皇皇乎又使諸生之奉教于公也必聽
記誦削詞章絕進取而後可則上懸此爲令久矣名
儒鉅公嘗于此出焉豈科舉之爲病乎惟士懷苟得
之心俸一日之掇則雖由此道而非所以設科取士
之意詞章陋矣甚者乃爲雷同剽竊之詞記誦陋矣
甚者乃記近科中選之作于是龔陋轉下而陷溺彌
深自以謂工于規得喪而不知其爲謀之非審則何
待乎有世道之責者閤然憂之而後掇之乎夫士誠
自憂之而自掇之則不必病科舉也就此風泉雲壑

間無變令之業而象山之筆簡秘書之愛藏未嘗不與公與復之至意儼然聚于一堂可尋也內照不冥密意斯在即記誦皆無聲之載卽詞章皆載道之器卽進取皆行義之位也何爲不可此則公與李公所屬望于諸生者而予紀其事因以爲諸生告焉公諱士英字伯彥遼東錦州人以治績高等轉本部左侍郎督漕之淮諸生感公之德謀諸郡丞龔君請予文勒之書院以貽久遠李長春字卉圃遼陽人是春撫粵藩隨以荆楚需才起遷左轄南康守高民望字興字

遼陽人葛蕃錫字福求密雲人別駕閔子奇字漢卿
錦州人司理胡淑寅字石林榆社人星令薛胤隆字
伯祥韓城人皆奉公與李公之檄以有事於白鹿者
應備書之

重修白鹿書院碑記

倫品卓

康熙十七年春祇謁鹿洞書院至聖先師之殿修祀
事也僚吏班階康士咸集各以次執事升降釋奠畢
退就彛倫堂小大受胙秩然以辨諸生相與揖于前
曰洞學之不肅有年矣毋論古國學之壇玷紫陽之

芳規諸先輩數百年後先興復締構維艱隆替不恒
惟是教育人材廣勵黌序各省臺憲下暨州郡司牧
罔非干城名教扶進士習爲當務今者從公采藻廟
貌更新俎豆重光百度庀飭誠百年一日之盛事微
我公肩鴻任鉅不及此敢請碑記用彰不朽余曰否
否吏懼不任職耳凡隸封疆之內洪纖難易繁簡疾
舒莫非隨分圖度惟矢毋自欺使不墮前人之績已
爾而況在三之誼敢以時紉自委今日勉告成事皆
藉先師之靈光諸憲臺捐助鼓舞之至意亦爾多

之厚幸也卓不敏其何力之與有乃欲歸然片石零
張觀聽邀一時督涓之聲聞哉諸生更進而言白鹿
洞爲四大書院之首縣昇元迄今八百餘載或灰燼
之餘建置更始或荒蕪之後踵事增華遠者不十數
年近者不數歲而傾圯隨之以致來游無停驂之宇
學士乏藏修之席頃自甲寅以來四郊多壘時則東
濕爲高爲下已無可因我公起而當之且靖萑苻且
集鴻雁且興廢墜諸凡繕錢以千百計者鱗比就緒
維此書院工最鉅費最稠度之風夜白之上臺維時

戒三邵文宗蒞洞遂以修復爲第一義前此弘治辛酉國賢邵先生提江右文衡爲洞學功臣麟炳郡乘今大宗師纘武高曾慨捐五百金藩臺姚公又捐二百金一倡一和事機有建督撫各憲無不克襄厥美何書院興復之有緣而後學津梁之多幸今日者大成殿爲賁爲離兩廡爲繩繩爲奕奕左新彝倫堂又左飭宗儒堂又左建三先生祠又左建先賢祠景往屬有如彼右新文會堂又右祠四公詔後起有如此堂宇弘厥房樞軒豁泰然無息戚有藉矣東西

添設號舍四十九間舊舍悉與完葺几榻堅好風雨
可一編矣庖廂有所僕從有屏不誼不雜矣垣墉繞
繞內氣翕集溝渠深廣外潦不入矣卓爾前亭斗魁
北面雲章後閣文昌帝臨層以木板淫濕無侵矣獨
對亭葺故閤新起龍亭武侯祠規模頓復大者維新
小者匝級冠履不錯文質咸備凡柱礎之屬若干陶
甕之屬若干木植之屬若干竹葦灰鐵之屬若干爲
工若干緡爲米若干斛不六閱月而告成悉維我公
口授指畫工竣之日而尺寸不忒非我公匠意經營

謀其大而圖其細集其成而計其久今日安得登
倫之堂而揖讓春風載色載笑哉不有金石之文曷
昭輪奐之美余曰需者事之賊也相其輕重緩急而
衡之夫梗楠杞梓非一日之材停蓄滋溉匪一人之
力毋高謝前人毋薄待後人物以有藉而相成功以
緝熙而能大董子曰愛惜人才爲社稷計卓與諸士
咸沐皇庥抃洙泗之澤長矣官謀其政士志其道
正心誠意各自砥礪不隕厥緒遠以廟紫陽先生
之鑑基近以副邵姚二憲盛之加意是則公之居

廟也若夫土木之工模範之功經緯之勞度支之
汝諸生亦旣縷陳顛末而悉數之矣惟是謹伺
而勤視烏鼠則有待卓不敏其何力之與有無以
以諸生之所已述者姑紀其事以告夫後之君子

重修白鹿書院記

冀霖

霖自束髮授書卽耳貴天下四大書院而白鹿
肇於唐李賓客之隱居而盛於宋淳熙七年考亭
子聚徒講學之地也蓋極天下之大觀已千有餘
矣雖不能至心竊嚮往之嗣是宦蜀歷燕訪之豫

薦紳之在都者爲余道其勝益切景行以不得親也
其所爲憾歲庚寅奉命視學江右巡試十一郡
惟南九二郡限於辛卯賓興之期不及週歷是歲
十月始補行科試馳節南康校士後卽至鹿洞白
鑿鑿清流潺潺竹籟松濤與山禽相上下余悚然
曰眞名教樂地也幸一蒞止竊竊日得遂所慕望
矣入洞門謁至聖先賢率在洞諸生行釋菜禮畢
其廡貌將廢榱桷迫圯凡諸齋室屏廡講堂學舍
氣薰蒸積久幾委腐蠹週遭中外低回扼腕者久

謀所以新之然試竣例卽還 朝懼不克竟所願也
辛卯冬荷大中丞耶公疏請復任蒙

恩俞允余因得再督學事此固 皇仁優渥亦先聖先
賢靈爽在天假手於余以爲修廢舉墜地也余能一
日已哉爰竭俸錢庀材鳩工又十三郡學田例賦所
入今悉輸以充工料之費又恐委貸他人奉行虛假
乃就南昌署中購木石瓦礫募匠斲削成材載以舟
致之鹿洞命役董其事于時先聖殿旁及兩廡以次
而講齋而學舍凡棟樑榑桷之腐黑撓折者蓋瓦級

輓之破缺者赤白之漫漶不鮮者增以整飭澤以黝
聖而輪奐燦然一新是役也經始于康熙壬辰九月
朔二日訖工于甲午六月望日凡三閱歲余之精神
夢寐畢注於此雖然其於考亭當日聚徒講學之規
模未諗何如也而余夙願實幸少酬焉先是廟祀至
聖諸賢像今且剝落攷諸故典祀像非畫也木主如
制然奉承已久不敢毀沒欲更新又懼失其真也
走力之曲阜逐一臨摹真像至如所摹樂聖之特
加金碧耳于今正殿兩廡迺若依然惟若若若

一堂授受而予于瞻拜之下愧乎如聞
俊乎如見亦不啻置身曲阜親侍立于杏壇泗水間無他形相肖神相往也余忝司文教分以振興多士爲急而於鹿洞尤惓惓者蓋以孔孟心傳闡於朱子朱子道學望於吾徒所繫匪淺鮮也故承乏以來卽請於鄖大中丞凡在洞童子英俊有志者另期考試拔尤者四人入南康府庠中丞允所請著爲例卽外郡魯入洞讀書者按試之日接閱試文亦急加錄取得遊泮者倍於往日無非鼓舞後進昭示來許將講院之英才麟

麟炳炳而考亭之薪傳世世繩繩是亦與道崇教之
一助爾今余三試已畢行將馬首而東也余惟聖賢
之道如日月之經天如江河之緯地固不以時會爲
升降而講院規制諸生學殖或有積久漸荒者所賴
守茲土者敦化導勤作育措養之之具擇教之之師
俾來學者踵相接春經夏誦彈琴鼓篪之聲無間寒
暑一如考亭夫子知南郡時則鹿洞實人才之都會
卽萬世吾道心傳之一大堂奧也誰謂古今人不相
及哉是又余之所厚望也夫昔康熙五才有三年甲

午中秋前三日記